




Literatura den Bon Dia

Ernesto E. Rosenstand



COMPANASHI

Cronica di recuerdonan scondi

Den e cunucu aki nan tabata warda e bacanan cu nan tabata mata na e matansha cu tabatin ei. E matansha aki tabata hopi primitivo. Ma aki na Aruba e temponan ei no tabatin otro. E cunucu mes tabata hopi seco. Esaki mes tabata dun'e un parecido na e yanonan cu tin na diferente pais Latino Americano. Seco y yen di baca! E temponan ei cosnan no tabata di e moderno ei.

Matamento di baca tabata pasa na e cunucu mes. E tempo nan ei nos no tabatin abattoir. Cosnan tabata hopi primitivo. Bestia chikito tabata mata na cas. Esaki mas tanto tabata sosode diadomingo mainta trempan despues di misa di marduga. Famia y bisña tabata yuda den esaki. Un suceso di otro mundo. Principalmente ora bo ta mucha.

Origen di e number ta desconoci, manera ta e caso cu hopi otro mas number di luganan aki na Aruba. Tin bisa cu e number a origina dor di cu ei tabata biba un homber cu tabatin un auto Nash. Esaki tabata marca di un auto hopi conoci e temponan ei. Y nan tabata yama e shon aki Compa Nash. Djei e number Companashi.

Pues esaki ta un splicacion di origen di e number. Cu seguridad no tin nada fiho. E ta parti di e leyendanan cu ta enrikese cultura di un pueblo. E shon aki tabata biba na e cas - cu ainda t'ei - parti pa suit di e cunucu.

Ma di un pa dos e shon aki a desaparece. Ningun hende sa unda ni ki dia el a bai. E number di e cunucu si a keda. Pues esei tabata e splicacion di e origen di e number di e cunucu, cu poco poco a pone e bario yama asina. Cu seguridad no tabatin nada cu por a mostra e origen di e number.

Despues hendenan cu tabata cuida e cunucu a bai biba ei. Esun di mas conoci tabata un Venezolano cu tabatin hopi forsa. E tabata Chilano. Si bo ripar'e bon e tabata tipico Indjan. Chikito, hancra, cara rondo.

Keto manera un anochi scur sin streya. Y su number tabata papia pa su mes. E tabata personifica su rasa masha bon mes. E tabata hopi keto mes. Tin biaha bo tabata haya e impresion cu e tabata papia den su mes. Otro característica di dje tabata cu e no tabata sa para keto. Continuamente e tabata move. E homber aki no tabatin miedo di nada. E tabata calmo en persona, e tabatin sanguer friu. Calculado manera su so! Principalmente ora cu e mester bai busca den cunucu baca pa nan mata.

Otro cu tabata impresiona nos pa su forsa tabata Nanito. Nan tabata forma un duo inseparabel Y di esaki si nos ta corda su fam. E tabata Nanito Diaz. Di Chilano si mi no ta corda su fam mas. Maske mester bisa cu

nunca mi a yega di tende su number completo. Pa nos mescos cu pa su amigonan e tabata solamente Chilano. Y nada mas! Nan tabata hombernan masha fuerte.

Nan tabata hombernan cu tabata domina e bestianan manera nada. Sin ningun clase di miedo. A lo Wild West. Ma Companashi tabata hopi mas cu e cunucu so. E tabata un bario unda tabata sa pasa hopi cos.

Cosnan cu bo por a ripara mesora. Ma tambe cosnan scondi, cu masha poco bo tabata ripara. Cosnan cu hopi biaha ni kere bo por kere nan. Ma nan a pasa. I den e cronica aki lo mi purba trata loke a pasa entre añanan cuarenta y cincuenta.

Nan ta asina hopi cu kisas lo mi por bai lubida un di nan. Ma laga mi cuminsa Nan ta cubri mas o menos 10 ana.

Pues un periodo di dies aña. Tempo hopi interesante, no pa Companashi so, ma pa henter Aruba. Mi añanan scolar aki na Aruba. Añanan di infancia, como tambe di mi hubentud.

Den un tempo cu masha poco tabata pasa na Aruba tog na Companashi a pasa cosnan cu bal la pena menciona Naturalmente esunnan cu mi mes a experiencia. . Esei segun ami ta kere.

Tin algun acontecimiento cu por a mira lus di dia, otronan, no! Ma algun di nan tabata hopi interesante mes. Esakinan lo mi conta boso poco poco pa di e manera ei boso por haya sa mas di e bario aki unda a lanta loke awendia nos ta yama: Muchanan di Companashi!

E temponan ei no tabatin di e cantidad ei, ma nan a cera cu muchanan di Socotoro y algun di Rancho, loke awendia ta Playa P'abou. Hunto cu e muchanan aki a practica deporte como tambe haci co'i mala mucha.

No bai kere cu for di cuminsamento caba mi a custumbra na dje. No! Ke ba! A costa basta tempo prome cu a integra. Cosnan no a bai di e facil ei. Tabata duro. Cuminsamento tabata hopi dificil.

Recuerdonan di lugarnan cu a keda atras ainda tabata bibo., y busca contacto cu e muchanan di a bario tabata bai hopi dificil. Mi mester a pensa hopi riba e luganan cu mi mester a laga atras. Ainda nan tabata fresco den mi memoria. Y esaki no tabata haci facil e integracion den e bario.

Nombernan manera Rio Frio, Sevilla, Aracataca, Fundacion ainda ta bibo den mi memoria. Esei mes tabata haci cu un teribel nostalgia tabata persegui mi. Di un manera impacabel.

No ta na Santa Marta so nos a biba. Por bisa cu ta den henter zona bananera nos a pasa Na un luga nos a keda mas cu na e otro, ma nos a yega di conoce nan tur. . Dor cu mi tata tabata traha cu e compania di trein nos mester a muda basta.